

極樂佛土之光壽依報---理事無礙、事事無礙

明 智旭要解 清 達默造鈔《阿彌陀經要解便蒙鈔》卷1：「三釋阿彌陀者。梵語阿彌陀。按無量壽經。含十三義。謂無量壽。無量光。無邊光。無礙光。無對光。光炎王。清淨光。歡喜光。智慧光。不斷光。難思光。無稱光。超日月光。名雖十三。不出光壽。故此經但云光壽也。光。乃心性橫遍十方之義。十方原無邊際。故云無量也。壽。乃心性豎窮三際之義。三際又無始終。故云無量。又橫中有豎。豎中有橫。橫豎交徹。不可思議。故云無量彌陀徹證心性橫豎之源。故曰無量光壽也。三身光壽。如疏中釋。分釋竟。」¹

【鮮】信事者。深信只今現前一念不可盡故。依心所現十方世界亦不可盡。實有極樂國。在十萬億土外。最極清淨莊嚴。不同莊生寓言。是名信事(以境為事)。

【鈔】現前一念不可盡者。豎窮橫遍故。依心所現十方世界亦不可盡者。若依一念我執心。則現同居世界。若依善心。則現善世界。謂三善道。若依惡心。則現惡世界。謂三惡道。此總喻迷人所見方相。亦豎窮橫徧。故不可盡也。若依一念法執心。則現方便世界。實報世界。法執有輕重。無明有厚薄。故方便分九人。實報有四十二人。所見不同。此總喻悟人所見方相。亦豎窮橫徧。故不可盡。若依無執之心。則現寂光世界。亦無豎可窮無橫可徧。是名真豎窮橫徧也。故前文云。豎無初後。橫絕邊涯。喻如非迷非悟人。原無豎橫可辯別也。實有極樂國。在十萬億土外者。謂上來所說四土。唯依心所現。心實有故。國土亦實有。故極樂實有四土。在十萬億土外也。最極清淨莊嚴者。四土圓融故。莊生。即莊子。姓莊。名周。寓言者。即南華經。寓者。寄也。託也。即託彼說此之語。雖有是名。原無其事。如云。有人名混沌。生而無七竅。人憐而鑿之。七竅有而混沌死矣。如此。則雖有是名。實無其人。佛說西方極樂世界。的確是有。故不同彼寓言也。信事竟。

△六信理分二。初明心性無外。二明事事無礙。△今初。

【鮮】信理者。深信十萬億土。實不出我今現前介爾一念心外。以吾現前一念心性實無外故。

【鈔】此心性無外。亦是境性無外。心境無二性故。介爾者。生無生論云。念佛之心。至微至劣。故稱介爾。以吾下。明不出心外所以也。以此一念雖然微劣。乃法界全體。本自豎窮橫徧。實無有外。故曰不出也。初明心性無外竟。

△二明事事無礙。

【鮮】又深信西方依正主伴。皆吾現前一念心中所現影。全事即理。全妄即真。全修即性。全他即自。我心徧故。佛心亦徧。一切眾生心性亦徧譬如一室千燈。光光互徧。重重交攝。不相妨礙。是名信理(以法界為理)。

【鈔】文分二段。初正明譬如下喻顯。正明具四法界。一念。即理法界。影。即事法界。全事即理等。即理事無礙法界。我心徧故等。乃事事無礙法界也。亦顯心佛眾生三無差別也。依。謂依報。即四土莊嚴。正。乃正報。即四土主伴。主。即彌陀三身。伴。乃人民等也。影者。從喻得名。謂此一念心性有四分。依正主伴乃相分。如鏡中之影。一念乃見分。如鏡光。心乃自證分。如鏡面。性乃證自證分。如鏡銅。四分唯是一心。故曰全事即理等也。全事即理者。全相分之事。即內三分之理。喻如全

¹ (CBETA, X22, no. 430, p. 819, c19-p. 820, a4 // Z 1:91, p. 441, c7-16 // R91, p. 882, a7-16)

鏡影。即鏡銅也。全妄即真者。全見相二分之妄。即內二分之真。見相二分。乃依他起性。依他如幻故。喻如鏡光鏡影。即鏡面故。全修即性者。全三分之修德。即證自證分之性德。喻如鏡影。鏡光鏡面。即鏡銅故。全他即自者。謂非唯我之相分。乃我心現。即佛菩薩等相分。亦我心現。謂共相識現也。共相識者。依報乃共中共。正報乃不共中共。故曰我心徧故也。我心徧故等者。謂我心王心所徧四土。佛心王心所亦徧四土。一切眾生心王心所亦徧四土。此約全境即心。故曰我心徧故等也。若約全心即境。則又曰我境徧故。佛境亦徧。一切眾生境性亦徧。喻如餓鬼所見之火。即人見之水。亦即天人所見琉璃。故曰事事無礙也。譬如一室千燈者。喻顯事事無礙也。一室。喻依報相分。千燈。喻正報相分。即佛身我身眾生身等。光。喻不變隨緣之心。室中虛空。喻隨緣不變之性。光光互徧。喻佛相分上。有我心所變相分。我相分上。又有眾生心所變相分。眾生相分上。又有佛心所變相分。佛相分。乃寂光土。眾生相分。且指實報土。及方便土。我相分。且指同居土。四土同在一處。故曰重重交攝。不相妨礙。又四土同在一處。故曰同居。四土皆為眾生建立。則又同一方便。四土皆是實行所感。則又同為實報。四土唯是一心。則又唯一寂光。故後文云。同居淨境。真俗圓融。不可限量。如此信者。方為信理。初釋六信竟。

△二釋二門分二。初正明二門。二明取捨事理。△今初。

【鮮】(此下明願)如此信已。則娑婆即自心所感之穢。而自心穢。理應厭離。極樂即自心所感之淨。而自心淨。理應欣求(此即理之事)。」²

【鮮】吾人現前一念心性。不在內。不在外。不在中間。非過去。非現在。非未來(學者須如此深研痛撈不可徒落在語言作道理領過)。

【鈔】現前一念心性者。正指一句佛號之體。無生論云。法界圓融體。作我一念心。故我念佛心。全體即法界也。並及日用浩浩之平常心。即妙宗謂分別之念也。此乃三科之總題目。三科乃別顯三諦也。心。乃不變隨緣之用。喻如水上之波。性。是隨緣不變之體。喻如波之溼性也。即下文寂照二義。後文光壽二義。體用不二。故曰恒寂恒照也。不在三處。非三世者。即妙宗謂心法當處不生不滅也。當處。即當體也。心法當體不可得。故不在內外中間。喻如全波即溼。溼外覓波不可得。故不在溼外溼內溼中間。心法當體不生不滅。故非三世。喻如海上之波。似有過去未來。全波即水。原無三世可得也。又不在三處。故曰橫遍。原非三世。故能豎窮。豎窮故曰寂。橫遍故曰照。照故曰光。寂故曰壽。古德云。十世古今不離當念。無邊剎海不隔毫端。故曰無量光壽也。」³

《阿彌陀經要解便蒙鈔》卷2：

***極樂世界【初、欄網行樹妙】

「又舍利弗。極樂國土。七重欄楯。(以嚴際畔)七重羅網。(以嚴空界)七重行樹。(以嚴露地)皆是四寶。周匝圍繞。是故彼國。名為極樂。

【鈔】極樂莊嚴。當閱大彌陀經。及十六觀經。茲不具錄。

△疏中分三。初總釋勝境。二別明四土。三問答破情。△今初。

【鮮】七重。表七科道品。四寶。表常樂我淨四德。周匝圍繞者。佛菩薩等無量住處也。皆四寶

² (CBETA, X22, no. 430, p. 828, c23-p. 830, a2 // Z 1:91, p. 450, c11-p. 451, c14 // R91, p. 900, a11-p. 902, a14)

³ (CBETA, X22, no. 430, p. 825, a15-b9 // Z 1:91, p. 446, d9-p. 447, a9 // R91, p. 892, b9-p. 893, a9)

則自功德深。周帀繞。則他賢聖徧。此極樂真因緣(內因外緣)也。

【鈔】文分二節。初略釋經文。表者。顯也。以果顯因也。七科。即三十七科道品。釋在後文。七科不出戒定慧。欄楯表戒。防過失故。羅網表定。以定覆心故。行樹表慧。道樹高遠故。四寶者。彼土寶實無量。但言四寶。表四德也。此土同居方便。唯有四倒。故曰凡聖四倒。彼土同居。人人實具四德。常者。無量壽故。樂者。但受諸樂故。我者。無量光故。具八自在我故。淨者。淨土無染故。八自在我者。一能示一身為多身。二以一塵身。徧大千界。三能示大身。輕舉遠到。四能現無量類。常居一土。五諸根互用。六得一切法。如無法想。七說一偈義。經無量劫。八身遍諸刹。猶若虛空。下文供養他方十萬億佛。即以食時還到本國。即此八大自在我也。皆四寶下。明勝境因緣也。自功德深者。多善根之因深。他賢聖徧者。多福德之緣強。此皆一句萬德洪名之所現也。總釋勝境竟。」⁴

****【二、池閣蓮華妙】：

「又舍利弗。極樂國土。有七寶池。八功德水。充滿其中。池底純以金沙布地。四邊階道。金銀瑠璃玻瓈合成。上有樓閣。亦以金銀瑠璃玻瓈碑磬赤珠瑪瑙而嚴飾之。池中蓮華。大如車輪。青色青光。黃色黃光。赤色赤光。白色白光。微妙香潔。」

【鈔】瑠璃。梵語。此云青色寶。又云不遠。去波羅柰城不遠故玻瓈。或云塞頗胝迦。此云水玉。又云白珠。似水晶。有赤有白。

△疏中分四。初總標異此。二明八功德水。三明充滿其中等。四明華輪等。△今初。

【鮮】上明住處今明生處。寶池金銀等所成。不同此方土石也(絕待之樂為濁世眾生須對待而論)。

【鈔】不同此方土石者。非但金寶與土石不同。亦乃凡聖迥別。此方是凡夫有漏染業所感。彼土乃聖人無漏淨業所成。又是彌陀願力莊嚴。此土如牢獄。彼土如天宮。豈可相比。言金銀七寶等者。彼土寶實無量。且順此方凡情所重。而言七種。乃至八功德水。亦順此方凡水言其似而已。此土天宮之寶水。尚不可思量。況聖人之域。豈可以凡情測度。也。以彼土隨拈一法。皆是彌陀三身四德。毫無差別故也。下皆倣此。

△二明八功德水。

【鮮】八功德者。一澄清。異此方渾濁。二清冷。異寒熱。三甘美。異鹹淡劣味。四輕軟。異沉重。五潤澤。異涸腐褪色。六安和。異急暴。七除饑渴。異生冷。八長養諸根。異損壞諸根。及疹戾增病沒溺等也。

【鈔】十六觀經云。八功德水。從如意珠王生。…一支作七寶妙色。其摩尼水。流注華間。尋樹上下。其聲微妙。演說苦空無常無我請波羅蜜。無量壽經云。彼諸菩薩。及聲聞眾。若入寶池。意欲令水沒足。水即沒足。乃至欲令灌身。自然灌身。欲令還復。水輒還復。自然隨意。開神悅體。蕩除心垢。清明澄潔。波揚無量自然妙聲。隨其所應。莫不聞者。疏云八功德者。若論寶水功德。其實無量。且順凡情略顯八種。一澄清異此方渾濁者。彼土寶水。非但自體澄清。還能澄清一切眾生身心。故經云。開神悅體。蕩除心垢也。此方之水。非但不能蕩除心垢。自體渾濁。復能渾濁一切也。二清冷異寒熱者。彼土之水。非但自體清涼。復能清涼一切。浴此水者。離一切熱惱故。此方之水。非但不能除惱。自體寒熱。復又寒熱一切。三甘美異鹹淡劣味者。彼方之水。非但自體甘美。復又甘美一切。飲此水

⁴ (CBETA, X22, no. 430, p. 847, a13-b14 // Z 1:91, p. 468, c16-p. 469, a5 // R91, p. 936, a16-p. 937, a5)

者。離苦得樂故。此方之水。非但不能離苦得樂。自體鹹淡劣味。(海鹹。河淡餘水味劣)復又鹹淡一切。四輕輒異沉重彼方之水。非但自體輕輒。復又輕輒一切。浴此水者。身心皆輕安故。此方之水。非但不得輕安。自體沉重。復又沉重一切。五潤澤異涸腐褪色。彼方之水。非但自體潤澤。復又潤澤一切。飲此水者。無有不得利益。此方之水。非但不得悉檀。自體涸腐褪色。復又涸腐一切(涸者。臭也。腐者。爛也。褪色者。日久色變也)六安和異急暴者。彼方之水。非但不急暴。自體安和。復又安和一切。經云。微瀾迴流。安詳徐逝。聞此水聲。皆得法忍。此方之水。非但不能說法。自體急暴。復又急暴一切。七除饑渴異生冷者。彼方之水。非但除色身饑渴。復除法身之饑渴。飲此水者。能得無量三昧辯才故。此方之水。非但不得法喜。自體生冷。復又生冷色法二身。八長養諸根。異損壞諸根。及沴戾增病沒溺等也者。彼方之水。非但長養色身諸根。復能長養法身諸根。謂信進念定慧。此方之水。非但不長養二身。復又損壞諸根。並及沒溺而死。沴戾而病也。(沴者。不和戾者。違戾)二明八功德水竟。

△三明充滿其中等。

【解】充滿其中。異枯竭汎濫。底純金沙。異汙泥。階道四寶異磚石。陞級名階。坦途名道。重屋名樓。岑樓名閣。七寶樓閣。異此方土木丹青也。樓閣是住處。及法會處。但得寶池蓮胞開敷。便可登四岸。入法會見佛聞法也。

【鈔】充滿其中。異枯竭汎濫者。彼方之水。非但充滿。復能善隨人意。經云。彼諸菩薩。及聲聞眾。若入寶池。意欲令水沒足。水即沒足。欲令至腰。即至於腰。乃至欲令還復。水輒還復。調和冷暖。自然隨意。此方之水。非但不隨人意。不是枯竭。便是汎濫。枯竭則不能得其用。汎濫則復更損壞一切也。底純金沙異汙泥者。彼土池底。或是金沙。或銀沙。或一寶沙。乃至無量寶沙等。此方池底。純是污泥。目不可覩。鼻不可聞也。便可登四岸。入法會。見佛聞法者。非但登東西四岸。乃登四德之岸。入四土之法會。見四身之佛。聞四教之法也。三明充滿其中等竟。

△四明華輪等。

【解】華輪者。輪王金輪。大四十里。且舉最小者言。若據觀經。及無量壽會。大小實不可量。由同居淨土身相不等故也。青色名優鉢羅。黃色名拘勿頭。赤色名鉢頭摩。白色名芬陀利。由生身有光。故蓮胞亦有光。然極樂蓮華。光色無量。此亦略言耳。微妙香潔。略歎蓮華四德。質而非形曰微。無礙曰妙。非形則非塵。故潔也。蓮胞如此。生身可(妙)知。

【鈔】華輪者。池中蓮華大如車輪也。車輪。乃金轉輪王金輪寶。輪王有四種。謂金。銀。銅。鐵。金輪王掌金輪。王四天下。有七寶千子。出人壽八萬四千歲時。純以十善化導。金輪寶大四十里。且舉最小蓮華而言。若據十六觀經。及寶積經中。無量壽如來會。所明大小。實不可限量。由同居眾生。身相不等故也。極樂蓮華光色無量者。非但蓮華無量。乃至光亦無量。色亦無量。此亦略言者。非但蓮華略言。乃行樹羅網寶池。金沙德水等。若光。若色。若依。若正。一一皆略言。以此經乃刪繁取要故也。略歎蓮華四德者。蓮華功德亦無量。非止微妙香潔四德也。質而非形者。質乃七寶之體質也。非形。謂非定大小之形。隨心如意也。無礙曰妙者。即隨心如意。故不可思議也。非形則非塵者。既隨心如意。全體唯心。經云。此見及緣。元是菩提妙淨明體。故曰非塵故潔也。蓮胞既微妙香潔。所

生之身。亦微妙香潔也。經文初釋生處竟。」⁵

【三、華樂伸供妙】：

**「舍利弗。彼佛國土。(空中)常作天樂。(下是)黃金為地。(中間)晝夜六時。雨天曼陀羅華。(上嚴空界。下嚴金地)其土眾生。常以清旦。各以衣祴。盛眾妙華供養他方十萬億佛。即以食時。還到本國。飯食經行。」

△疏中分二。初合科義。二釋經文。△今初。

【解】樂是聲塵。地是色塵。華是色香二塵。食是味塵。盛華散華經行是觸塵。眾生五根對五塵可知。

【鈔】眾生五根。受用此五種淨塵。故云五根五塵明受用也。

△二釋經文分四。初釋常作天樂等。二釋曼陀羅華等。三釋即以食時等。四釋飯食經行。

△今初。

【解】常作者。即六時也。黃金為地者。七寶所嚴地界。體是黃金也。日分初中後。名晝三時。夜分初中後。名夜三時故云晝夜六時。然彼土依正各有光明。不假日月。安分晝夜。且順此方假說分際耳(但可順此方比擬不可隨此方情見)。

【鈔】常作天樂者。此土五塵。以天為極。故曰天樂天衣天食等也。然彼土音樂。非天可比。無量壽經云。世間帝王百千音樂。自轉輪聖王。乃至第六天上妓樂音聲。展轉相勝千億萬倍。第六天上萬種樂音。不如無量壽國。諸七寶樹。一種音聲。千億倍也。此稱天樂者。一者。順此方凡情。二者乃第一義天之樂也。以佛國土中。隨拈一法。皆彌陀三身四德。毫無差別也。黃金為地等可知。

△二釋曼陀羅華等。

【解】曼陀羅。此云適意。又云白華。衣祴。是盛華器。眾妙華。明非曼陀羅一種。應如妙經四華。表四因位。供養他方佛。表真因會趨極果。果德無不遍也。且據娑婆言十萬億佛。意顯生極樂已。還供釋迦彌勒。皆不難耳。若阿彌神力所加。何遠不到哉。

【鈔】妙經四華者。法華經云。爾時世尊。入於無量義處三昧。是時天雨曼陀羅華。摩訶曼陀羅華。曼殊沙華。摩訶曼殊沙華。而散佛上。摩訶曼陀羅者。此云大適意。曼殊沙。此云柔軟。大柔軟。表四因位者。四華表顯十住。十行。十向。十地。四種真因菩薩位也。供養他方佛。表真因會趨極果者。以妙華供佛。表顯真因皆趨向於佛果也。何故供養他方佛。表顯果德徧在一切處也。餘文可知。

△三釋即以食時等又三。初明神足難思。二明事事無礙。三明法門甚深。△今初。

【解】食時。即清旦。故曰即以。明其神足不可思議。不離彼土。常徧十方。不假逾時迴還也。

【鈔】神足不可思議者。六通中有神足通。亦名神境通。亦名如意通。有三種。一能到。謂身能飛行。如鳥無礙。移遠令近。不往而到。此沒彼出。彼沒此出。一念能至十方世界。二轉變。大能作小。小能作大。一能變多。多能變一。三聖如意。化現無方。應變不測。此乃自力神足。尚不可測。況借如來神力。豈可思議。故不離彼土。常徧十方。不假逾時迴還也。逾者。越也。非過時而還本國也。

△二明事事無礙。

【解】此文顯極樂一聲。一塵。一剎那。乃至跨步彈指。悉與十方三寶貫徹無礙。

⁵ (CBETA, X22, no. 430, p. 848, c1-p. 850, a7 // Z 1:91, p. 470, a16-p. 471, c10 // R91, p. 939, a16-p. 942, a10)

【鈔】上文神足。乃約事釋。今乃約理顯。神足非作意通。乃法爾如然。法性之理也。此文顯極樂一聲一塵者。謂隨拈一法也。淨土中隨拈一法。皆究竟清淨真如。真如無分別。無分劑。攝盡十方無盡三寶。皆在是一法之中。十方三寶。亦究竟清淨真如。真如無分別。無分劑。攝盡極樂無盡三寶。一法既爾。法法皆然。故得跨步彈指。互相貫徹無礙。由貫徹無礙。故得不離彼土。常徧十方。供佛還國。在於同時無礙也。故曰我此道場如帝珠。十方三寶影現中。我身影現三寶前。頭面接足歸命禮。

△三明法門甚深。

【解】又顯在娑婆則濁重惡障。與極樂不隔而隔。生極樂則功德甚深。與娑婆隔而不隔也。

【鈔】娑婆如牢獄。不隔而隔。極樂如天宮。隔而不隔也。釋即以食時等竟。

△四釋飯食經行。

【解】飯食經行者。念食食至。不假安排。食畢鉢去。不勞舉拭。但經行金地。華樂娛樂。任運進修而已。

【鈔】飯食經行者。意顯不假安排做作。不勞舉拭淨洗。無有障道塵緣。但有金地經行。華樂娛樂。勝緣助道耳。經文初正明竟。

△二結示。

舍利弗。極樂國土。成就如是功德莊嚴。

【鈔】經文初約五根五塵明受用竟。

△二約耳根聲塵明受用。以此方耳根最利。故別就法音廣明。其實極樂攝法界機。五塵一一圓妙。出生一切法門也。

【鈔】眾生五根。各有利鈍。如香積佛國眾生。舌根利。故香積如來以香飯作佛事。又有以天衣作佛事者。乃身根利。此方眾生耳根最利。故釋迦佛以音聲作佛事。故佛頂經云。此方真教體。清淨在音聞。是故此經別就彌陀法音。廣明其受用。若究實論。極樂圓攝法界機。五塵皆圓皆妙。皆能出生一切法門。非止音聲一塵也。」⁶

【四、化禽說法】：

**「復次舍利弗。彼國常有種種奇妙雜色之鳥。白鶴。孔雀。鸚鵡舍利。迦陵頻伽。共命之鳥。是諸眾鳥。晝夜六時。出和雅音。其音演暢五根。五力。七菩提分。八聖道分。如是等法。其土眾生。聞是音已。皆悉念佛念法念僧。」

△疏中分二。初釋鳥音。二釋法利。△今初。

【解】種種奇妙雜色。言多且美也。下略出六種。舍利。舊云鶯鶯。琦禪師云是春鶯。或然。迦陵頻伽。此云妙音。未出穀時。音超眾鳥。共命。一身兩頭。識別報同。此二種西域雪山等處有之。皆寄此間愛賞者。言其似而已。六時出音。則知淨土不以鳥棲為夜。良以蓮華托生之身。本無昏睡。不假夜臥也。

【鈔】種種奇妙雜色之鳥者。非但多。而且美。十六觀經云。如意珠王。湧出金色微妙光明。其光化為百寶色鳥。和鳴哀雅。常讚念佛念法念僧。琦禪師。即元朝楚石梵琦禪師。姓朱。甯波象山人。云是

⁶ (CBETA, X22, no. 430, p. 851, a3-p. 852, a16 // Z 1:91, p. 472, c6-p. 473, d1 // R91, p. 944, a6-p. 946, b1)

春鶯者。西齋詩云。舍利即春鶯。修眉漆點睛或然者。亦未可定也。妙音鳥未出殼時者。大論云。如迦陵頻伽鳥。在殼中未出。聲超餘鳥。正法念經云。山谷曠野。其中多有迦陵頻伽。出妙音聲。若天若人。緊那羅等。無能及者。唯除如來音聲。共命一身兩頭。識別報同者。梵云耆婆耆婆迦。此翻生。勝天王經云。生生。或翻命。法華云。命命。雜寶藏經。名為共命。心識各別。同一報命也。此等諸鳥。皆寄此間愛賞者。言其相似。名雖相似。體却不同。乃如意珠王所生寶鳥。原是彌陀化身也。初釋鳥音竟。」⁷

****「【鮮】問。化作眾鳥何義。答。有四悉檀因緣(此經悉檀皆是第一義中具下三悉)。凡情喜此諸鳥。順情而化。令歡喜故。鳥尚說法。令聞生善故。不於鳥起下劣想。對治分別心故。鳥即彌陀。令悟法身平等。無不具。無不造故。**

【鈔】文並易知。鳥即彌陀者。鳥即法界藏身。令聞法者悟入法界藏身。無一法不具。無一法不造。得入理益也。此釋悉檀。皆是第一義中具下三悉者。迥異他經故。他經具四教四悉。此經純圓教四悉。圓教乃第一義諦之教。佛乃第一義諦之人。於圓教中乃分證四悉。故是第一義中具下三悉也。分證四悉。釋在下文。問答顯益竟。」⁸⁾

「【鮮】此中顯微風樹網等音。及一切依正假實。當體即是阿彌陀佛三身四德。毫無差別也(可謂法界標指)。

【鈔】法界標指者。直指法界之語也。法界者。當人自性也。此中顯等者。依報妙一科之中。顯極樂六塵之境也。微風。乃觸塵。樹網。乃色香味三塵。音。乃聲塵。假。即假法。乃法塵。實。即實法。總前五塵。此六塵中隨拈一法。當其全體即彌陀三身四德。毫無差別。既是佛三身四德。亦眾生三身四德。亦我三身四德。毫無差別。故曰心佛及眾生。是三無差別。故為圓融法界標指。又為第一義諦悉檀也。經文二徵釋略顯竟。大科化有情聲竟。」⁹

【五、風樹協韻妙】：

△二化無情聲。

舍利弗。彼佛國土。微風吹動。諸寶行樹。及寶羅網。出微妙音。譬如百千種樂。同時俱作。聞是音者。自然皆生念佛念法念僧之心。

△疏中分二。初明念三寶因緣。二明念三寶四益。初。

【鮮】情與無情。同宣妙法。四教道品。無量法門。同時演說。隨類各解。能令聞者念三寶也。

【鈔】情與無情。盡是彌陀之妙體。風動樹網。全吐廣長之舌相。如來一音說法。眾生隨類各解。然雖各解。終歸一體三寶。明念三寶因緣竟。」¹⁰

****「舍利弗。其佛國土。成就如是功德莊嚴。」**

△疏中分二。初正明唯心妙境。二訶破愚迷。△今初。

【鮮】重重結示。令深信一切莊嚴。皆導師願行所成種智所現。皆吾人淨業所感。唯識所變。佛心生心。互為影質。如眾燈明。各徧似一(性相圓明)。全理成事。全事即理。全性起修。全修在

⁷ (CBETA, X22, no. 430, p. 852, a20-b21 // Z 1:91, p. 473, d5-p. 474, a12 // R91, p. 946, b5-p. 947, a12)

⁸ (CBETA, X22, no. 430, p. 856, c5-15 // Z 1:91, p. 478, b2-12 // R91, p. 955, b2-12)

⁹ (CBETA, X22, no. 430, p. 856, c17-p. 857, a3 // Z 1:91, p. 478, b14-c6 // R91, p. 955, b14-p. 956, a6)

¹⁰ (CBETA, X22, no. 430, p. 857, a4-14 // Z 1:91, p. 478, c7-17 // R91, p. 956, a7-17)

性(佛性修皆是性生是修)。亦可深長思矣。

【鈔】令深信者。藏通別三教之信。皆是淺信。此乃圓融事事無礙之信。故曰深信。一切莊嚴者。四土莊嚴也。願行所成者。四教願行所成也。以此為因。種智所現者。乃至果成一切種智所現。此明佛心所變相分莊嚴。全莊嚴乃佛心也。皆吾人淨業所感者。以此為因。唯識所變者。乃至果成唯識所變。此明眾生心所變相分莊嚴。全莊嚴乃眾生心也。佛心生心。互為影質者。亦可云佛境生境。互為影質。全境即心故。此謂佛之莊嚴。為本質境。而却在眾生心中。為獨影境。眾生莊嚴。為本質境。而又在佛心內。為獨影境。佛乃眾生心內彌陀。名為自性彌陀。眾生乃佛心內人民。喚作自性眾生。故曰自性眾生誓願度。乃至自性佛道誓願成。一人如是。眾多亦然。隨拈一塵一法。皆是此境。法性法爾如是。非關造作。四土皆然。非但實報也。如眾燈下。更以喻明。如眾燈之明。各徧一室。似一而不分。却是各燈各明。佛心眾生心。共變四土莊嚴。似一而不分。却是各人各莊嚴。然同業同相分。似難分。但看人見是水。鬼見是火等。別業別相分。則唯心唯莊嚴。事事無礙之境。易可知也。全理成事。全事即理者。全心成境。全境即心也。如全冰成水。全冰即水也。全性起修。全修在性者。全性具莊嚴。而起成修德莊嚴。全修德莊嚴。而還在心性中。不出心外。心性本無外故。如全海成波。全波在海。不出海外。故曰唯心淨土。自性彌陀也。亦可深長思者。此理微妙。非邪智淺智可知也。」¹¹

**「舍利弗。於汝意云何。彼佛何故號阿彌陀。」

【解】此經的示持名妙行。故持徵釋名號。欲人深信萬德洪名。不可思議。一心執持。無復疑貳也。」¹²

【鈔】如來徵釋名號者。此經的確開示執持名號以為妙行。故特徵釋之。欲人深信萬德洪名。即不思議境。一心執持。…圓收圓超一切法門。故曰無復疑其有貳也。

△二釋二。初約光明釋。二約壽命釋。阿彌陀。正翻無量。本不可說。本師以光壽二義。收盡一切無量(確妙)。光則橫徧十方。壽則豎窮三際橫豎交徹即法界體。舉此體作彌陀身土。亦即舉此體作彌陀名號(速須信入)。是故彌陀名號。即眾生本覺理性。持名。即始覺合本。始本不二。生佛不二。故一念相應一念佛。念念相應念念佛也。

【鈔】此懸示名號功德不可思量。令人一心執持無疑也。阿彌陀正翻無量者。翻梵成華也。無量者。本不可思量也。不可思量。故不可言說。真如門意也。雖不可說。而不礙言說。故本師約生滅門。以光壽二義。收盡一切無量。以壽義。收盡不可說一切無量。以光義。收盡言說中一切無量。光則橫徧十方者。心性寂而常照也。壽則豎窮三際者。心性照而常寂也。橫豎交徹。即法界體者。橫中有豎。豎中有橫。即圓融法界之體。法界體者。即心性不變常隨緣。隨緣常不變。乃十界之大綱宗。實相之正體也。故古德云。法界圓融體。作我一念心。故我念佛心。全體即法界也。舉此體作彌陀身土。則彌陀三身四土。乃此一念變作。如舉墨成畫。全畫即墨。舉體作名號。則全名號乃此一念變作。如舉墨書字。全字亦是墨。名號即本覺者。即心即佛也。始覺合本者。能所不二也。始本不二。生佛不二者。唯此現前一念心性也。現前一念。常與佛號相應。則一念相應一念成佛。念念相應念念成佛。不隨九界之緣故也。

¹¹ (CBETA, X22, no. 430, p. 857, b10-c18 // Z 1:91, p. 479, a1-b15 // R91, p. 957, a1-b15)

¹² (CBETA, X22, no. 430, p. 858, a10-12 // Z 1:91, p. 479, c13-15 // R91, p. 958, a13-15)

△今初約光明釋。

舍利弗。彼佛光明無量。照十方國。無所障礙。是故號為阿彌陀。

△疏中分二。初釋佛光無量。二明佛光無礙。初又三初約證釋二約願釋三簡三身。△今初。

【鮮】心性寂而常照。故為光明(一切諸佛之心要)。今徹證心性無量之體。故光明無量也。

【鈔】心性寂而常照者。明所證理體也。辯體中云。實相之體。非寂非照。而復寂而恒照。此即彌陀所證實相。不變而常自隨緣也。能隨染淨緣。具造十法界。故為光明也。徹證心性無量之體者。明能證之智德也。徹證者。以一心三觀。證一心三智。從名字證。乃至究竟證。心性無量智德之體圓顯。故光明無量也。一切諸佛之心要者。即此現前一念之心性也。

△二約願釋。

【鮮】諸佛皆徹性體。皆照十方。皆可名無量光。而因中願力不同。隨因緣立別名。彌陀為法藏比丘。發四十八願。有光明恒照十方之願。今果成如願也(可悟心佛)。

【鈔】此科明隨四悉檀因緣立別名也。若但約證釋。則諸佛體同。不能立其別名。立別名者。必假因緣。不然。則墮無因之過。因緣者。為眾生作四悉因緣也。彌陀為法藏比丘者。世界悉檀也。發四十八願者。為人悉檀也。有光明恒照十方之願者。對治悉檀也。今果成如願者。第一義悉檀也。可悟心佛者。點示入理益也。

△三簡三身。

【鮮】法身光明無分際。報身光明稱真性。此則佛佛道同。應身光明有照一由旬者十百千由旬者。一世界。十百千世界者。唯阿彌普照(方是極樂淨宗)。故別名無量光。然三身不一不異。為令眾生得四益故。作此分別耳。

【鈔】文分二節。初正簡。然三身下。明隨益也。法身光明無分際者。無相故。橫遍十方。豎窮三際故。報身光明稱真性者。自受用報身。稱合法性也。應身光明不等者。應機而現。隨機隨處隨時不等故。由旬者。無正翻譯。乃輪王巡狩一停之舍。如此方館驛也。唯彌陀普照者。阿彌應身。普照四土也。四土圓融故。三身一體故。故別名無量光。乃是極樂園融淨宗也。二明隨益。三身不一不異者。佛身不可思議。離戲論故。三身皆是法身故。為眾生隨四悉之益。作此一異分別耳。初釋佛光無量竟。

△二明佛光無礙。

【鮮】當知無障礙。約人民言。由眾生與佛緣深。故佛光到處。一切世間無不圓見也(例下壽命確極不然佛光皆照十方何勞頌祝)。

【鈔】佛光在佛分上原無礙不礙。所言礙無礙者。皆在眾生分上論也。若眾生不念佛。故與佛緣淺。緣淺故障深。故礙。今由念佛眾生。與佛緣深。緣深故障淺。故佛光到處。一切世間無不圓見三身光明也。有三種世間。一正覺世間。二九界有情世間。三依報器世間。經文初約光明釋竟。

△二約壽命釋。

又舍利弗。彼佛壽命。及其人民(壽命皆)無量無邊阿僧祇劫。故名阿彌陀。

△疏中分二。初正釋壽命。二重釋光壽。初又二。初釋佛壽無量。二釋生壽無量。初中三。初約證釋。二約願釋。三簡三身。△今初。

【鮮】心性照而常寂。故為壽命。今徹證心性無量之體。故壽命無量也。

【鈔】心性照而常寂者。明所證理體也。實相之體。非寂非照。而復照而恒寂。此即彌陀所證實相。隨緣而常自不變也。雖隨染淨緣。其體自如如。故為壽命也。徹證心性無量之體者。明能證之斷德也。…故壽命無量也。

△二約願釋。

【解】法見壽命無始無終。報身壽命有始無終。此亦佛佛道同。皆可名無量壽。應身隨願隨機。延促不等。法藏願王。有佛及人壽命皆無量之願。今果成如願。別名無量壽也。

【鈔】此亦明隨願因緣立別名也。法身無始無終者。不生不滅故。報身有始無終者。有始覺故有始。稱法性故無終。此亦證道皆同。應身隨願隨機。延促不等者。願長則壽延。願短則壽促。機長則壽延。機短則壽促。或願長機短。則促長令短。或願短機長。則延短令長。各隨四益。或延促其壽。或延促其機。故曰不等。佛有延促智故。法藏下。明隨願力因緣立別名也。

△三簡三身。

【解】阿僧祇。無邊。無量。皆算數名。實有量之無量。然三身不一不異。應身亦可即是無量之無量矣。

【鈔】阿僧祇等。皆算數名者。乃算數別名也。別名有十。謂阿僧祇。無量。無邊。無等。不可數。不可稱。不可思。不可量。不可說。不可說不可說。此乃佛菩薩。所知算數。尚非二乘所知。況凡夫也。實有量之無量者。乃應身之無量。非法報二身之無終之無量。阿彌陀有涅槃故。觀音菩薩次成佛故。然三身下。破情計也。即此應身。即法即報。即無量之無量也。釋佛壽無量竟。

△今初。

【解】當知光壽名號。皆本眾生建立。以生佛平等。能令持名者。光明壽命。同佛無異也。

【鈔】光壽名號。皆本眾生建立者。豎窮橫遍名號。本於眾生現前一念心性建立。以現前一念心性。本自豎窮橫遍。故曰生佛平等也。能令持名者同佛無異者。

△二別明又二。初明光義。二明壽義。△今初。

【解】復次由無量光義。故眾生生極樂。即生十方。見阿彌陀佛。即見十方諸佛。能自度。即普利一切。

【鈔】此明持無量光之因。證無量光之果也。生極樂即生十方者。極樂。即華藏世界。生華藏世界。即橫生四土。阿彌陀佛。即毗盧遮那。見毗盧遮那佛。即圓見三身。能自度。即頓破無明。則五住圓斷。故前文云。盛眾妙華。供養他方十萬億佛。即以食時。還到本國。飯食經行。

△二明壽義。

【解】由無量壽義。故極樂人民。即是一生補處。皆定一生補佛。不至二生。

【鈔】此明持無量壽之因。證無量壽之果也。此即圓證三不退果也。二別明竟。

△三結勸。

【解】當知離却現前一念無量光壽之心。何處有阿彌陀佛名號。而離却阿彌陀佛名號。何由徹證現前一念無量光壽之心。願深思之。願深思之。」¹³

¹³ (CBETA, X22, no. 430, p. 858, a10-p. 860, a20 // Z 1:91, p. 479, c13-p. 481, d5 // R91, p. 958, a13-p. 962, b5)